

Tahun 2026 Kerajaan Madani melangkah lebih berani

Oleh MAISARAH SHEIKH RAHIM
utusannews@mediamulia.com.my

PUTRAJAYA: Datuk Seri Anwar Ibrahim menegaskan, kerajaan akan melangkah dengan lebih berani mulai tahun hadapan, termasuk dalam aspek penguatkuasaan serta menangani isu-isu berkaitan bahasa dan kaum yang selama ini dianggap sensitif atau kontroversi.

Perdana Menteri berkata, selepas hampir tiga tahun memastikan kestabilan Kerajaan Perpaduan, sudah tiba masanya kerajaan berdepan isu tertangguh secara lebih tegas demi kepentingan rakyat dan negara.

Katanya, dalam tempoh hampir tiga tahun ini, kerajaan berada dalam keadaan stabil walaupun sebelum ini wujud kebimbangan mengenai ketidakstabilan politik.

Menurut Anwar, dalam tempoh tersebut kerajaan telah mula memperkenalkan beberapa undang-undang penting yang menjurus kepada Akta Tanggungjawab Fiskal, rasionalisasi subsidi dan pembaharuan institusi.

“Saya berpendapat, mulai tahun hadapan, sudah tiba masanya untuk kita melangkah dengan lebih berani.

“Isu-isu tertangguh yang selama ini dianggap sensitif atau kontroversi perlu ditangani dengan lebih tegas dan berani,” katanya ketika taklimat media bersama ketua-ketua pengarang media tempatan dan antarabangsa di sini, semalam.

Anwar berkata, langkah ke depan kerajaan selepas ini me-



ANWAR Ibrahim menyampaikan taklimat kepada ketua-ketua pengarang media tempatan dan antarabangsa di Putrajaya, semalam. - UTUSAN/FAISOL MUSTAFA

rangkumi keberkesanan agensi penguat kuasa, ketegasan dalam mengambil tindakan serta memastikan semua proses dan peraturan dipatuhi tanpa kompromi.

“Sebab itu saya berbangga dengan langkah yang diambil baru-baru ini, yang jarang berlaku sebelum ini, apabila pegawai kanan negara diambil tindakan sementara, tanpa sebarang usaha melindungi salah laku jenayah besar,” katanya.

Anwar menegaskan, ketegasan dalam siasatan, pendakwaan dan proses semakan penting bagi memulihkan keyakinan rakyat terhadap institusi negara termasuk Suruhanjaya Pencegahan Rasuah Malaysia (SPRM), Lembaga Hasil Dalam Negeri (LHDN) dan agensi lain.

“Bukan sahaja pelaksanaan perlu tegas dan berkesan,

malah proses itu juga mesti dihormati,” katanya.

Dalam pada itu, beliau menegaskan kerajaan tidak boleh tunduk kepada naratif songsang atau suara-suara sumbang berkaitan isu kaum dan agama yang boleh menggugat kestabilan negara.

Katanya, dalam isu-isu berkaitan kaum, bahasa dan ekonomi, kerajaan juga perlu berdepan dengan lebih tegas dan tidak berlapik.

“Kita tidak boleh terns bermain dengan sentimen perkaurman atau agama yang akhirnya menghalang kemajuan negara,” katanya.

Mengulas isu bahasa, Anwar menegaskan komitmen kerajaan untuk memperkukuh Bahasa Melayu sebagai bahasa kebangsaan, tanpa menafikan kepentingan bahasa Inggeris dan bahasa-bahasa lain.

Jelasnya, Tahun 2026 bukan tahun 1950-an yang mana hidup dalam dunia global, dan penguasaan pelbagai bahasa adalah satu keperluan.

“Bahasa Inggeris penting, begitu juga bahasa Cina, Tamil atau Arab. Namun, komitmen untuk memperkukuh Bahasa Melayu mesti kekal sebagai asas kepada identiti dan perpaduan negara,” katanya.

Berhubung isu Sijil Peperiksaan Bersepadu (UEC), Anwar menegaskan, perkara itu sering dipolitikkan sedangkan pendiriannya konsisten sejak dahulu.

Katanya, UEC bukan isu utama, dan bukan soal menolak atau menerima semata-mata, tetapi melihatnya dalam konteks lebih luas iaitu bersandarkan sejarah negara, sistem pendidikan nasional dan keperluan memperkukuh bahasa kebangsaan.